



01  
3958  
PB-82

Broj: 07-03-04-49840-82/25  
Sarajevo, 20.11.2025. godine

**SKUPŠTINA KANTONA SARAJEVO**  
**- ovdje -**

**Predmet: Odgovor na zastupničko pitanje Smiljane Viteškić, dostavlja se**  
**Veza: Vaš dopis, broj 01-04-49840-11/25 od 15.10.2025. godine**

Zastupnica Smiljana Viteškić, na 25. radnoj sjednici Skupštine Kantona Sarajevo održanoj dana 15.10.2025. godine, u okviru tačke Dnevnog reda „Poslanička/zastupnička pitanja, inicijative i odgovori”, a u skladu sa članovima 211. i 214. Poslovnika Skupštine Kantona Sarajevo, postavila je zastupničko pitanje koje glasi:

- ”1. Koliko iznose dugovanja Veterinarske stanice i da li su razlog za dugovanja 'obaveze iz prošlosti' ili se zataškavaju dugovanja koja nastaju u ovom mandatu?*
- 2. Koliki je omjer uposlenici veterinarske struke naspram administracije?*
- 3. Da li je istina da su uposlenici koji su članovi SDA izloženi svim mogućim vrstama pritiska?*
- 4. Da li moguće da uposlenici koji rade u ambulantama općina gdje su načelnici iz SDA rade po 12 sati i više dnevno sedam dana u sedmici i da se pri isplati plaća ne poštuje platna lista?”.*

Shodno ovom zastupničkom pitanju, po Vašem aktu broj i datum veze, Ministarstvo privrede Kantona Sarajevo pribavilo je odgovor KJP „Veterinarska stanica” d.o.o. Sarajevo, br. 1110/25 od 29.10.2025. godine, koji Vam ovim putem dostavljamo.

S poštovanjem,



Prilog:  
- kao u tekstu.

Dostavljeno:  
① Naslovu,  
2. Vladi Kantona Sarajevo - na znanje,  
3. Evidenciji,  
4. Arhivi.



Broj: 1110 /25

Sarajevo, 29.10.2025. godine

**Bosna i Hercegovina**  
**Federacija Bosne i Hercegovine**  
**SKUPŠTINA KANTONA SARAJEVO**  
Ul. Reisa Džemaludina Čauševića 1,  
71000 Sarajevo

**Bosna i Hercegovina**  
**Federacija Bosne i Hercegovine**  
**KANTON SARAJEVO**  
**Ministarstvo privrede**  
Ul. Reisa Džemaludina Čauševića 1,  
71000 Sarajevo

**Predmet: Odgovor na zastupničko pitanje**

**1. *Koliko iznose dugovanja veterinarske stanice i da li su razlog dugovanja „obaveze iz prošlosti“ ili se zataškavaju dugovanja koja nastaju u ovom mandatu?***

Zahvaljujem na postavljenom pitanju koje se tiče finansijskog stanja KJP Veterinarska stanica d.o.o. Sarajevo.

Na dan 30. septembra 2025. godine, obaveze preduzeća prema dobavljačima iznose 316.869,00 KM. Moram naglasiti da se te obaveze izmiruju otežano, a razlozi za to su višeslojni i dugoročne prirode.

Prvo, preduzeće od svog osnivanja nije u mogućnosti da samostalno finansira poslovanje isključivo iz vlastitih prihoda. Poslovanje se kontinuirano subvencionira iz budžeta Kantona Sarajevo, putem transfera koje dodjeljuje resorno Ministarstvo privrede. To je sistemski model koji je uspostavljen pri osnivanju preduzeća i koji se održava do danas.

Drugo, Uprava preduzeća je u periodu od 2021. do 2025. godine bila suočena sa blokadama žiro računa, uslijed izvršnih sudskih presuda koje su se odnosile na ranije pravne sporove. Po godinama, zatečeni iznosi su sljedeći:

- 2021: 72.247,86 KM
- 2022: 177.915,54 KM
- 2023: 155.870,13 KM
- 2024: 49.701,97 KM
- 2025: 533.484,24 KM

- **Ukupno: 989.219,74 KM**

Važno je naglasiti da se vrijednost tužbenih zahtjeva regresira iz kantonalnog budžeta, ali iz sredstava koja su već predviđena za sufinansiranje plata i dobavljača. Time se direktno umanjuje iznos koji je dostupan za tekuće poslovanje. S druge strane, zatezne kamate — koje su zbog dugog vremenskog perioda gotovo jednake osnovnim iznosima tužbi — finansira isključivo preduzeće, što dodatno opterećuje njegovu likvidnost.

Sudski sporovi se najvećim dijelom odnose na radnopravne odnose i obaveze prema Poreskoj upravi iz perioda 2012–2018. godine. Preduzeće posjeduje svu relevantnu dokumentaciju, uključujući presude, datume podnošenja tužbi i podatke o tadašnjim odgovornim osobama. Uprava je poduzela korake u izvještavanju vlasnika i pokrenula postupke regresiranja prema odgovornim licima iz tog perioda.

U normalnim okolnostima, tekuće poslovanje bi se moglo servisirati iz vlastitih prihoda i redovnih budžetskih transfera. Međutim, 2025. godina je posebno teška, jer je na naplatu stigao iznos od preko pola miliona KM iz ranijih sudskih sporova, što je ozbiljno ugrozilo tekuću likvidnost preduzeća.

Zaključno, jasno je da se preduzeće već pet godina nalazi u kontinuiranom izazovu održavanja likvidnosti, isključivo zbog naslijeđenih sudskih obaveza. Uprava čini sve da se situacija stabilizuje, ali bez sistemske podrške i rješavanja uzroka iz prošlosti, teško je očekivati dugoročnu finansijsku održivost.

## **2. Koliki je omjer uposlenici veterinarske struke naspram administracije?**

- 2019. godina 15,69% administrativnog osoblja
- 2020. godina 14,29 %
- 2021 godina 14,58 %
- 2025 godina 15,69 %

## **3. Da li je istina da su uposlenici koji su članovi SDA izloženi svim mogućim vrstama pritisaka?**

Uprava preduzeća nema, niti po zakonu može imati, uvid u članske karte političkih partija svojih zaposlenika. Zakon o radu ne predviđa stranačku pripadnost kao uslov za zapošljavanje, niti je poslodavac ovlašten da takve podatke traži, evidentira ili koristi u procesu zapošljavanja. Kriteriji koji se primjenjuju su isključivo stručne kvalifikacije, kompetencije i reference kandidata, u skladu s opisom radnog mjesta.

Istina je da su naši pojedini zaposlenici, konkretno veterinari na terenu, bili kandidati na listama političkih stranaka, a neki su izabrani i u lokalna vijeća. Njihovo političko djelovanje odvija se u skladu sa zakonima ove zemlje, van radnog vremena, i ne utiče na njihovu profesionalnu obavezu prema preduzeću. Uprava u tome nije vidjela ništa sporno — naprotiv, smatramo da njihova angažovanost može doprinijeti boljoj povezanosti preduzeća sa lokalnim zajednicama.

Ukoliko se zahtjev da se posao obavlja stručno, odgovorno, zakonito i u interesu preduzeća tumači kao pritisak — onda je to pritisak koji svi mi osjećamo. Jer svi mi, bez obzira na političku pripadnost, imamo obavezu da svoj posao obavljamo savjesno i profesionalno. Stranačka pripadnost u tom kontekstu ne igra nikakvu ulogu.

Preduzeće ostaje opredijeljeno ka transparentnom radu, poštivanju zakonskih normi i jednakom tretmanu svih zaposlenika. Politička aktivnost, kada je u skladu sa zakonom, nije i ne smije biti razlog za diskriminaciju, niti za sumnju u profesionalni integritet pojedinca.

4. Da li je moguće da uposlenici koji rade u ambulantama općina gdje su načelnici iz SDA rade po 12 sati i više dnevno sedam dana u sedmici i da se pri isplati plaća ne postoji platna lista?

Kao što smo naveli, stranačka pripadnost kako uposlenika, a također i Načelnika općina u kojima KJP Veterinarska ima svoje ambulante, kao ni stranačka pripadnost stanovništva tih općina nije relevantna za obavljanje poslova. Kao što smo naveli, terete pritiska koji se odnose na pozitivno poslovanje preduzeća su disperzirani na sve nas, uključujući Upravu. Platna lista je obračunski dokument preduzeća na temelju koje se isplaćuje plaća.

S obzirom da se radi o pitanjima koja su politički konotirana, a čiji sadržaj nema nikakvog utjecaja na poslovanje Preduzeća, nadamo se da ista nisu vrsta pritiska na Upravu da eventualno vodi računa o tome ko je kakve stranačke pripadnosti, kako bi eventualno protekcionistički vodila računa o uposlenicima. U to svakako nećemo da vjerujemo.

Voljeli bismo da naši uvaženi zastupnici, vijećnici, iz bilo koje političke opcije ukažu na značaj KJP Veterinarske stanice za javno zdravstvo Kantona Sarajevo te se, vis-a-vis toga zalažu za omogućavanje dodatnih finansijskih sredstava ovom Preduzeću čime bi se poboljšalo javno zdravstvo Kantona. Unaprijed se zahvaljujemo i u ime Kolektiva ali i građanja Kantona Sarajevo.



DIREKTOR

Dostaviti:

1. Naslovu
2. a/a